



*Senin, 29 April 2024*  
**Ogen: Lukas 1: 46-56**



**Tendingku muji Tuhan**



**N**ggo rusur kita ngikuti pesta iman i bas gerejanta, subuk Natal, Paskah, Kenangkihen Tuhan Jesus ku Surga bagepe Pentakosta. Tapi si jadi penungkenen, kadenta nge si erpesta e? apakah terjeng babahta nge, cupingta nge, matanta nge, tanta nge, naheta nge? Tentu adi si jabap maka kerina ring-ring kulanta enda ikut erpesta. Tapi uga kerna tendinta (jiwa), ikut nge erpesta? Ntahsa i bas keriahen pesta iman e, tendinta tetap nge gegana (gelisah, galau, merana), kering ras kosong.

Sabap mbue gundari tendi-tendi manusia muji sesuatu. Lit deba mujiken kekuasaan, lit deba mujiken teknologi aminna pe babahna lalap erpengaku maka tendi kami muji Tuhan. Adi payo tendinta muji Tuhan, engkai maka pujindu IA? Erkiteken kai maka pujindu IA? Tentu erbage-bage jababna. Tendingku muji Tuhan erkiteken IA si Mada Kuasa, tendingku muji Tuhan erkiteken IA mehuli kal. Sabap IA megiken ras njabap pertotonku. Sabap IA nehi sura-surangku. Mpepalem pinakitku. Merekén dalam pulah i bas persoalen-persoalenku. Kerina e sah-sah saja, tapi si eteh nge maka tendinta muji Tuhan erkiteken IA Juruselamat? Sabap IA e me Dibata nandangi keselamaten tendinta, labo terjeng erkiteken IA ngkuhi sura-sura daging kulanta.

Magnificat e me sada kidung/ende-enden si ncerminken kontemplasi si dem kerendahen hati kerna perkuah ate Tuhan si mbelin man dirina. Maria meteh maka kerina jelma i bas kerina jaman ermeriah ukur erkiteken perbahanen-perbahanen si mbelin si ilakoken Tuhan man bana. Maria tek maka dirina kalak si rendah ras lemah ipeganjang Tuhan alu kuasaNa jadi sada testimoni man kalak sideban, maka ise pe si tek man baNa tetap ndatken keselamaten arah perkuah ateNa. Emaka alu kai kita muji Tuhan? Alu si lit i bas kita tapi si terutama e me alu tendinta. Ise si puji e? Banci saja nterem tapi i bas sie kerina e me muji Tuhanta. Engkai maka kita muji Tuhan? Erkiteken mbue hal tapi si terutama ras si pertama erkiteken Ia Juruselamatta.

☞ *“Puji Tuhan arah pusuh si mbagesna”*